

KUMPUAN
RAMLEHHNAM
HUMHALH

YMA



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.16 15th April 2012

Conference hun atan 23-25 Oct 2012

Chanmari West, April 15 : Ni 11st April, 2012 khan Central YMA hallah Central YMA President Pu T Sangkunga kaihhruaina hnuiah Central Co-Ordination Committee meeting Vawi 68-na chu an thu a, member 177 an kal. He meeting-ah hian Chanmari West Branch YMA aiawhin Vice President Pu R. Lalhmachhuana a tel a ni. He meeting hian Conference in a lo rel tawh bawzuiin khawpui hrang hrang ten Common Cemetery neih chungchang chu Sub-Hqrs. leh Group Hqrs. ten mahni thlanmual tur theuh lo zawn a, a ramri leh zauh zawng te Central YMA ah thlen leh nise, a tul anga Central YMA in lo bawh zui tura tih a ni.

YMA General Conference hun atan October 23th -25th, 2012 ruat a ni a, Conference hi Kawrtethawveng in an thleng dawn a ni. Hnamdang hlawhfa rate meeting hmasa lamin an

lo rel tawh chu, CEC ten lo enzuiin a tul angin Mizoram Sawrkar hnenah thlen tura tih a ni. Gas, Buhfai leh Petrol tih chingpen awm thin chungchangah Food, Civil Supplies & Consumer Affairs Department-in thawhho puia an sawmna an lo pawm tawh pawh chu mahni awmna Branch theuhah a ven hna thawk theuh turin an inchah thar bawk a ni.

Local Council News

TENDER NOTICE: Chanmari West Local Council huamchhunga Bawlhawh pailh hna dil theih a ni a. He hna dil duh chuan Pu F. Zosanga, Chairman Local Council, Chanmari West hnenah Dt 25.4.2012 ral hma ngein dilna ziaka thehluh tur a ni. Diltu chuan Bawlhawh pailhna motor a nei ngei tur a ni a, vengchhung mi bawlhawh pailhna motor nei chu duhsak an ni ang.

HRIATTIRNA:

1. AMC Area chhungah tu pawh in sa thar tur emaw, sak belh tur emaw, thiat leh sa thar tur chuan AMC-ah dilna Form lain Local Council kaltlanga dil vek tur a ni. AMC phalna la hmasa lova in rel chu an hna chawlh tir leh thiah tir nghal theih a ni ang.
2. Ni 16.4.2012 (Thawhtan) zan khan Local Council kaihhruaiin khawtlang huap NGO, Kohhran aiawh, Political Party aiawh leh Prominent Citizen-te YMA Zawlbukah Gas chungchang leh Bawlhawh pailh chungchangte sawiho a ni.



Thawlehni zinga Zawlbuk sak hnatlenga thawkte chuan kawng an lai zo

Branch News

Ni 17.4.2012 (Thawhleh) zan khian Branch Executive Committee koh tum a ni.

Ni 11.4.2012 a CCC meeting neih kan Branch aiawhin Pu R. Lalhmachhuana, Vice President a tel.

Ni 12.4.2012 a Tui hna humhalh Seminar neih Central YMA hall a neih kan Branch aiawhin Tv Zairemmawia, Asst. Secretary a tel.

Zawlbuk sakna atan bialtu MLA in a fund min pek chu kan dawng kim ta a, hemi lakchhuah theih nana min buaipui saktu Pi Zairemi 'CH Section' chungah branch Committee chuan lawmthu a sawi.

Ni 10.4.2012 zing kara YMA Zawlbuk sak hnatlang te tan thingpui tak lum saktu Pu Lalremruata Hauzel te chhungkaw chungah Branch Committee chuan lawmthu an sawi. Ni 13.4.2012 zanah pawh khan hruaitu hnatlang hi chhunzawm a ni a, mi 26 zet hnatlang an thawkchhuak.

YMA AW man Section ten kan khawn ang ang kha a ranglamin Production Manager Pu R. Lalhmachhuana hnenah thehluh tur a ni e.

Branch Secretary Pu RL Thahnuna, chhungkaw thilah Kolasib-a zin pawh dam takin alo haw leh ta.

PEM CHHUAK

1. Pu Lalneihsanga te chhungkua Pu Lalchungnunga 'T' Section te In luah chu Chanmari ah an pem



TUNKAR CHANGVAWN

"Tihtak meuhvin, tihtak meuhvin ka hrilh a che u, buh fang leia tlak lohva a thih loh chuan a mal chauhvin a awm reng thin, a thih erawh chuan tam takin a rah thin."

Johana 12:24

Editorial Board

Editor:	J.Lalnangliana	9862399658
Joint Editor :	Lalchhandama	9862358347
News Editor :	Thangkhuma	9862303135
	R. Lalrinngetha	9862358337
	Jacob Lalrinsanga	9612319779
Cir.Manager :	Johny Lalthanpuia	9612359161
	EVL. Hruaitluanga	9862655426
Production Manager :	R.Lalhmachhuana	9436151817

Branch Office Bearer

President	T. Ngurkhuma	9436190843
Vice President	R. Lalhmachhuana	9436151817
Secretary	RL. Thanhnuna	9436152760
Asst. Secretary	Zairemmawia	9862385654
Treasurer	C. Lalzarliana	9436142049
Fin.Secretary	K. Darthantluanga	9436196071
Adviser-te :	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

Editorial :

Kum bul kan tan dawn chauh emaw tih laiin Tau thla kan lo chuangkai leh ta reng mai. Heti ang hunah hian veng chhunga pawl hrang hrang hmalak naah hian tlema han chawl deuh hunlai hi a thleng ve chawk a. Chutih rual chuan mimal leh chhunguate chuan tihtur hran hran chu kan nei theuh awm e. Hetianga chauh hun a lo thlen hian inrel mai lova, infuih tawn zawk hi kan chak thar lehna tur a ni awm e.

Ruahtui a tla tan leh ta. Chhungkaw tinin kan in leh lo, tui luan kawr kan siam danah fimkhur a ngai, thenawmte tana hnawksak lo zawnga kan khawsak a tha khawp mai. Kan tui chhe pahd danah hian kan mizia a lang thui khawp mai. Thenawmte in hmun leh ram timin thei mai zawnga ruahui pahd mai te pawh a hlauhawm. Kan hriat theuh angin kan veng chu kham panga awm kan ni a, vawi khat ruahui leh tui hawk kalsual mai mai pawh hi hlauhawm a chang thei tlat.

Kan News Editor ropui chanchin hi ngaihnawm deuh a ni, in sawi ve ni kan han siam thar a, a duh tan thu rawn thawh theih a ni, chhuah vek erawh kan bhran lo.

2012 Thuvawn

I awmdan tur chu LALPA chungah nghan la; Amah chu ring la, aman a ti vek ang.

Article :**'Boss' Masangtea 15 nei ta ila...**

T-a

'Masangtea 15 kan nei thei lo a nih pawhin 10 tal nei ngat ila chuan..; Chuti a nih loh pawhin section inkimin panga tal pawh ni thei se'

A la theih loh fo a nih chuan pahnih chu ni theih hram se a duhawm ngawt mai, hmasawnna a zuana zuang mai lovin a thlawhia a thlawpui phathovin ka ring. Atheih ngang lo a nih pawhin vui thei kan ni lo.

Pakhat chauh pawh hi; YMA AW-ah ngat phei chuan 'active' lutuk avanga ban ngai awmchhun a ni hial ang. Heti ang hi thil thleng thei lo tura ngaih a nih laiin, 'The Big Boss' Masangtea'n a thlen tir thei.

2008 khan YMA AW editor-ah zingkar nei lo Pu Lalnunthara Sailo an ruat a, circulation manager-ah Tv Jacob "Boss" Lalrinsanga ruat a ni bawk. Hemite pahnih hnathawh dan mawlh mai hi...

Hmanhmawh lo takin editor-in zirtawp zan dar kua vel atangin YMA AW-a thu chhuah tur a chhu tan. Tlai dar 5 vela chaw ei kham tawh Masangtea tan chuan zan dar 8-ah ril a tam leh hman.

Mahse, thingpui hmeh tur chungchangah dar 8:30 vela zanriah ei editor a thu ber a, zan rei thlengin a ril a tam ve tawh si lo va, dar 9 vela mu thin Boss lah dar 11 tleng thlengin YMAAW vangin a meng rei.

"Eng vangin nge YMA chanchinbu avanga meng rei 'The Big Boss' hi ei tur tam tawk leh tuhnai tha kan chhawp loh."

Zan lam harsatna chu ngaihtuah zui atan dah phawt ang. Harsatna chhah ber mai, inrinnia thleng, chhungril lama inhmuhthiam lohna mawlh mai hi..

Pakhat zing dar 6-ah a tho dahir tawh; dar 8:30-ah chaw a ei fel a, thu khaw muang ve ngial mah se chhungril lama turtu lian lutuk avangin a teihawi rei thei lo. Zirtawpni a intan atangin Masangtea thinlungah YMA AW bak a awm lo.

Inrinniah Lois Bet-in an chhut turin a dah a ngai a, tlaiah a lam leh a ngai. Chutah agent hnenah a sem darh bakah, sub agent hnenah a sem zui leh zel a la ngai cheu.

Amah delh rittu leh a thinlunga turtu lian tak avangin inrinni tukthuan ei kham a nih tawh chuan YMA AW chhutna, editor inah a kal lo thei lo. Mahse, mihring chhai lo zet nen an inhrawn miau a, an tum dan leh hmalak dan a in-zu-ra thei lo chiang em em.

Zing dar 9-ah a ngainat em em PENDRIVE kengin editor inah Masangtea'n chhut fel tawh lak chhuah a tum a, a lo la tho lo. Kaihthawh mai chi a nih loh avangin Boss chuan section fang kual leh rihih, YMA hmalakna hrang hrang a en lawr.

Chumi hnu chuan editor inah a kal leh. Chaw hma dar 11:00 a ni tawh a, editor a lo tho deuh chiah a, an varanda-ah zing thingpui a lo in. Zan lama an chhut zagh hman loh avangin nakin deuhah i rawn lam dawn nia tiin an inthlah leh.

Boss chuan YMA hruiatu thenkhat a kan kual leh a, mahse, YMA AW-a a mawphurhna a la hlen si lo. Rilru pangkhang deuh chungin a tei ruk ruk a, dar 12 pelh hnuh a thinlunga awm lian ber editor inah YMAAW chhut zagh tawh lam tumin a kal leh ta.

Editor chuan a dawrah zial pak khu tual tual chungin hmanhmawh lo zetin inleng a lo kawm a, mimal hna lamah buaina a neih avangin zan lama chhut sa bak a la chhut belh hman lo tih a lo hrilh. Boss ngaihdan a pel deuh nge hmun dangah kal duh tawh lovin a nghak ta tlat a.

Editor lah chuan a hmanhmawh phah der bawk si lo. Tlai dar 3 a ri tawh a; editor chuan zan lama mi bak a la chhut belh hman lo. Boss lah a helhhawh tawh bawk si a, chhut tur ber keng chuang lovin a chhutna hmun Lois Bet-ah a han kal ringawt a, rei tawk fang thuin dawr thuthlengseiah thang khat vel zet chu a han muthlu.

A thim deuh that that tawh tiin Editor dawr lamah Masangtea a let thla leh a, editor chuan thil awm dan chu ning tawh hle mah se a tilang bik lem lo va. Editorial ziah chiah a hmabak tawh tih hrilhin Boss ngaihdan a ni bik tawh lo a ang hle.

Tichuan, editor chuan editorial chu a ziak zung zung nghal chuang lo va, tlai dar ruk a ri deuh der. Editor chuan Boss muthlu chu sawi harhin a dah theih tawh tih a hrilh a, phunnawi miah lovin Boss chuan Lois Bet a panpui a, vawi li a lamnaah a hlawhtling hram a, tum hnih chiah a muthilhsan.

Heti ang hian 2008 inrinni apiangin hun an hmang a, pakhatin a zo tlai thei bawka tlaiah lam tawh ang a ti lo kum tluan a, pakhatin a rawn lam hma thei sia kan zo hma deuh teh ang a ti chuang lo kumtluan niin a hriat.

Tichuan 2009-a editor turin Pu Lalnunthara Sailo bawk an ruat leh a, kum hmasaa kal kim thlap Masangtea erawh ruat nawn a ni ve ta lo. Eng vang nge tih hi chhui fe tham a nih laiin, a chhan hria U Nuntharate tan chuan sawi chhuah kher a tul lo.

Masangtea pakhat chauhin thiltih sawi hmawr hawnna lek a ni a, amah hrir 15 nei ngat ila chuan aw....

TAITESENA

» An hruaitu Tv Johny Lalthanpuia te chhungkua chu YMA Zawlbulukh an insawn a, an ui hle. Neuva Section tan mi tangkai tak a nih ngei an duhsak

» Chhungtinte faina kawnga tan la thar turin an innge.

» Rokhawlhna dang a awm loh chuan Ni 19.4.2012 hian Section Committee meeting tum a ni.

VANAPA

» An member NI Lalnunmawii Pautu (Nutei) D/o Pu VL Thakima chu 3rd Mizoram University Festival-a Dance Competition-ah 1-na a ni a, an chhuang hle.

» Ni 19 .4.2012 (Ningani) hian Section Committee meeting koh tum a ni a, hruaitute hunawl lo insiam turin an inhriattir.

» Hruaitu leh member-te YMA hmalaknaa tan la thar turin an innge.

» Pu F. Lalnunzama chu motor-in a chesual a, a dam leh thuai an duhsak.

CHAWNGBAWLA

» Pu C. Lalramdina (L) te chhungkua chuan Section No leh mamawh danga hman atan Rs 5000 an pe a, hetianga YMA leh khawtlang tana mi tangkai an nei hi ropui an ti a, an chungah hian Section Committee chu a lawm hle.

» An member Tv. K. Lalremsanga (Sangtea) chuan RMSA-ah hna a hmu thar a, an lawmpui hle.

» Chhiatni fund la ti fel lo ten a rang lama tihfel tum ni se, YMA AW man pawh kan khawn ang ang a thehluhna hmum turah thehlut vat turin an innge.

NEUVA

» YMA AW man khawn mek a ni a, Dt 15. April. 2012 ral hma a pe vek turin an innge.

» Taitesena Section hruaitu Tv. Johny Lalthanpuia te chhungkua in an section chhung a, in an luah chu lawmawm an ti a, Section tan a mi tangkai tak anih an beisei.

» Blanket suk ni a Pu H.Suanate chhungkua in thingpui an lum sak avangin lawmthu an sawi a, sumtuakna atan a blanket suk tirtute zawng zawng chung lawmthu an sawi bawk.

» Tv. Lallriatkima'n a thlawn a, Section flag a chhinchhiahna a chhutsak chu lawmawm an ti hle.

» Branch activities hrang hrangah Section hruaitu leh memberte tan la leh zual turin an innge.

CWSC volleyball

» D-3 Inter Village Volleyball Tournament-ah Ni 13.4.2012 (Zirtawpmi) khan Sihphir Village Council Volleyball Team te 3-0 a hnehin Quarter Final an lut a, Ni 14.4.2012 (Inrinni) khan Muanna Veng nen an inkhel leh a. Result kan hre hman ta lo a ni.

» Local Council hruaituten veng chhung Players te an enkawlna chungchangah Volleyball Sub-Committee chuan lawmthu a sawi tak meuh meuh a ni.

» Pu Thangsuanmanga'n Spray leh Creep Bandage-2 a rawn pek avangin an lawm hle.

» 2nd Division Season Ending Volleyball Tournament chu Ni 16.4.2012 (Thawhtan) atang hian Chawnpui Volleyball Court ah tan a ni dawn.

» An Vice Chairman Pu F.Lalhmingmawia, National Refree exam nei a Odissa a kal pawh tluang takin a rawn haw leh ta.

» Player indaih lohna avangin Pu Lalhachhuana N Sect chu koh a ni.

Tam hi a tha a ni

Kan veng hi Aizawlah pawh lian pawl tak kan ni a, mihring pawh a tam ber pawl kan ni. Pem khawm, rethei te te awmkhawm ni mah ila, hetia a tam pawl tak kan nih hi chuan kan lo zahawm a, kan lang ropui thin a ni. Pawisa thawh angaih pawhin nuai tela thawh thei awm mah suh ila, kan tam miau avang hian tlem te te kha a lo tling khawm tam thei thin.

YMA member pawh kan tam miau avangin kan bawhna lam chu na takin kan bawh theih phah a, hma pawh chak takin kan lak theih phah a ni. YMA Branch dang tan chuan zuamawm lo deuh mai kan ni a, eng emaw buai nikhua pawha thlamuanpui awm tham nih hi a nuam a ni.

Politik lamah ni kan tam avang ngawt pawh hian kan awmna Ward-ah hi chuan kan veng mi leh sa ngei kan neih reng theih hi a beisei awm em em a ni. Kan veng thelekna lam apiang hi, kan awmna MLA bial pawh hian a hawi thei tlat.

Mizoram Kohhran lian ber awmna veng kan ni leh bawk a, anni pawh hi thawhawm thawh tam sawm zingah an lang phak a, chu chu an tam vang a ni pakhat. Amaherawhchu, inthen darh an tum a, an chak loh phah ang tih a hlauhawm hle.

Kan veng hi inthen darh lo ila, mihring singkhat em pawh la awm lohna hi chu kan la tam tawk lo a ni, tun ai hian la tam zel ila, kan President hi Branch dang bulah chuan hawi larh thei turin lian ila, Upa leh hruaitu dangte pawh hi mi dang lakah chuan lang larh thei tur khawp hian lian bawk ila, lei ropuina tal chu kan khum ve deuh alawm le.

Inkhel leh intlansiak

European football zinga Mizote en nasat leh ngaihven ber English Premier League hmawrbawk a hnai tawh a, zanin hian Manchester United chuan inrinni zana khel Manchester City dinhmun hre chungin Aston Villa an mikhual dawn.

City-in Norwich mualah an khel a, an chak chuan United aiin point hnihil an hniam dawn a, Red Devils-in point an hloh a nih chuan City-in champion thei turin hun tha an nei thei. Achhan chu April 30-ah City-in Etihad Stadium-ah United an mikhual dawn a, tunah hian goal difference-ah an tha zawk.

Zanin dar 8:30 atangin United leh Villa-in an khel tan ang. Alex Ferguson-a team hian April 22-ah season tawp lama khawng tak Everton an mikhual leh dawn a, hei hi a pawimawh hle ang. City an tlawh hnuin Swansea an mikhual ang a, season kharna May 13-ah Sunderland mualah an zin chhuah a ngai bawk.

City-in April 22-ah a mawng phah Wolves tlawhin, United an mikhual zawk hnu May 6-ah season tawp lama che tha Newcastle an tlawh a ngai a, May 13-ah QPR mikhualin season an khar ang.

Season liam ta khan United-in a vawi 19 nan English title lain, 1990 atanga Liverpool-in title 18 laa record an kawl thin an khum fel a, a vawi 20 nan champion turin an dinhmun a tha. City hian 1968 hnuah English title an la leh ngai tawh lo va, 1992-93 season atangin Premier League kalpui a ni a, kumin hi season tawpa title inchuh zinga an tel hmasak ber a ni.

Spanish league-ah Real Madrid-in kum thum a zawna champion tawh Barcelona kut atanga title laksak tumin Catalan team lakah hma an hruai a, an hmahuina erawh ngaihthatpui tham a ni bik lo.

Serie A-ah Juventus nge champion lai AC Milan champion nawn leh dawn ti a chiang lo em em a, point khatin Milan lakah Juve an sang a, inrinni zanah Milan-in an mikhual Genoa an hneh chuan point hnihil an sang ang. Mahse, zanin dar 6:30-ah Juve-in Cesena mualah an khel ve leh dawn.

Vawiin chhun dar 12:30 atang hian 2012 F1 championship round thumna Chinese Grand Prix an tlan dawn a, kumin hi chak tur sawi lawk harsat kum niin an sawi. Chutih laiin season tir atangin McLaren car a tha hle a, mahse, Mercedes GP-in danglam deuh hleka an car thla hma an siam avangin Shanghai tlankawnga inbuatsaihna an neihah McLaren nen an inel tawk a, Mercedes car hian inhnialna a chhawk chhuak nasa hle.

An tlan hnuhnun ber Malaysia-ah ruahsurin a tibuai a, beisei loh thil tleng zuiin Ferrari driver Fernando Alonso a chak ber a, pahnihnaah Sauber khalstu, Ferrari hual Sergio Perez a tleng. Mahse, Alonso chuan an car-in hmasawnna lian tham a nei lo va, China-ah atan chet that zui a harsat turzia a sawi.

In sawi vena

☞ LPS TV Cable Connection Vengchhung a mi hi lo khawih ching an awm thin a, lo khawih tawh loh a va tha ve, tuartu an awm thin.

☞ Chanmari West Vengchhung ti fai tur hian tumah rawih hrana pa an awm ve lo, Mahni in leh a vel hi tifai ila YMA ten thenfai hna hi thawh thawh a ngai lo tur.

☞ Lirthei neite hian Garage hi chu nei theuh ila ke a kal a nuam sawt ang. Registration lah hi Garage nei lo pawhin an ti thei zel mai si a, hui ha hei ha.....

☞ Vengchhung hmun thenkhat laiah ek in leak rimchhe deuh deuh a awm leh nual ta mai. Thuneitute hian hma han la teh un.....!!

☞ Vengchhung mi awm tha duh lo ho hi na deuh thek thok a vau beh an ngai a, Thuneitute leh YMA tangrual in, tih tak zet a tih an ngai a ni lo maw.

☞ Vengchhung UI leh AR te tal hi chu D.C Order dinglai ang hian khuahkhirh ni tawh teh se.

☞ NLUP te hian Pasal nei vek sela chuan NLUP sem a ngai lo mai tur. A nih loh pawhin NLUP tla hlangte hi dawn tur a awm ve mai lawm ni.

☞ Kawngpui hrui phumna tura an rawn laih khuar hi a lung awmsa hian a daih lo tlat mai, ringtu lo la bo palhut te khan la lo ula chuan an siam zo tawh hial mai thei!!

Thlanmual Sub-Committee

☞ Dt.12.4.2012 zan khan Pu Thanseia, Chairman Inah Committee pawimawh tak neih a ni.

☞ Kuang duan sa nei section te hnenah Kuang cheina dah a ni.

☞ Taitesena, Khuangchera leh Neuva Section ah te hian Kuang duansa a awm a. Chhiat kan tawh palh hlauh chuan a tul ang a pawh mai tur a ni.

☞ Dt.16.4.2012 (Thawhtan) zing dar 6 ah hian Thlanmual thing kih hnatiang neih tur a ni a, Sub-Committee hruijute kal theuh tur a ngen kan ni e.

HEI LE LIMBU TUI

Limbu Tui fir tha tak kan nei reng e, min dawr thin tuten min han dawr leh teh u. Man tlawmtein kan pe chhuak leh ta chur chur e.

VL. Chhunga, T- Section

2-2 Ph:9862926173

Property Committee

☞ Mike chhia a awm a, kan awmna hmun atanga kan hre thei lo anih chuan hruijute hnenah hriattir tur a ni e.

FOOTBALL NEWS

☞ Tv JH Lalmawizuala leh Pu F. Thangpuia te chuan Football 1 ve ve an pe a, an lawm hle.

☞ MFA Cup khel tura inbuatsaih mek a ni a, Player te Thawtanni zing Dar 6:30 ah High School Field-ah kim taka practise tur a ni e.

Badminton News

Mizoram Badminton Association (MBA) Open Championship 2012-ah Chanmari West badminton Club atangin U-13, U-15, U-17, Above-50 leh Above-55-ah te chhuah a ni a, Above-55-ah Pu R. Rokima leh Pu Zokima te'n Final lutin Silver Medal an la a, Chanmari West Badminton Club te'n an lawmpui hle.

ZOFA news

☞ Rallu Lam Documentary Film siam tura inbuatsaih mek a ni a, Pu VL Thakima, Vice President Thu ziak (script) chang tura hma lak mek a ni. ☞ An hruijute Pu V. Lalrinpuia te chu YMA Zawlbuk (N-sect) lamah an insawn.

MUP NEWS

☞ Area chhunga Unit tin te Lenghawm zaia intihsiaik tur a ni a, Chanmari West MUP Unit a member zawng zawngte hla zir turin Pu R. Thangdailova Inah Ni 15.4.2012 (Pathianni) chawhnu inkhawm banah thahnemngai taka kal khawm tur a ni. ☞ Tar Pension la te tan a lak leh theih tawh e.

Mistiri Association News

☞ Mistiri ruai duhte tan awlsam zawk a mistiri an hmuh theih na turin heng nunber-ah hian zawk theih a ni e.

1. Pu H. Lalthuama President
9612387693
2. Pu Lalrinmawia Ralte Secretary
9612234250

KEIMAHNI

☞ YMA AW chhutnaah kan kal kim a, a nuam thin khawp mai, Branch Asst Secretary Tv. Zaitea'n min tawiawm thei kan phuisui lehzual. Lal Johny-a Taitesena Section atangin Zawlbuk Neuva Section-ah an insawn ta bawk. Thu chhuah tur nei ten inthlahrung hauh lovin rawn thehlut zel teh u.

CHHUANAWM

☞ 15th AMKA Mizoram Karate Championship 2012 intihsiaikna date 11-13 April, 2012 chhunga Electric Veng YMA Hall, Aizawl neihah Chanmari West Karate Player-te an che tha leh hle a; hetiang hi an medal lak dan a ni.

1. Vanlalthanpuia S/o T.C.Lalremsiama (V)- Gold 4
2. Vanlalnelawma S/o T.C.Lalremsiama (V)- Gold 4
3. Reuben Lalhmingmawia S/o Roluahpuia (V)-G-2, S-1, B-1
4. Lallawmkimi D/o R.Lalbiaksanga(L)(V)-G-1,S-1
5. Lalkhawngaihi D/o Zohmingsanga (V) Silver-1
6. Lalthakimi D/o H.Lalpianthanga(V) Silver-2
7. Vanlalchhuana wma S/o T.C.Lalremsiama (V) Bronze-1
8. Malsawmda wngzela S/o T.C.Lalremsiama (V) Bronze-1
9. VL.Pekhlua S/o K.L.Remsanga(T) Bronze-1

10. Vanlalhmangaihsanga S/o K.L.Remsanga (T) Bronze-1

11. Lallawmkima Kawlni S/o Lalriata (CH) Bronze-1

☞ Vanlalthanpuia leh Vanlalchhuana wma S/o T.C.Lalremsiama te chu Ni 20-22 April, 2012 chhunga New Delhi-a National Karate Championship-ah Mizoramaiwha khel turin thlan an ni a, Ni 16.4.2012 hian Aizawl an chhuahsan ang.

☞ Ni 13-16 April 2012-a National Level Children Theatre Festival, Mumbai-a neih turah kan veng atangin heng a hnuai kan tarlante hi thlan an ni a. Theatre Drama minute 45 awh, 'Hatao Aba Aba' an chang dawn.

1. Lalmuanawmi D/o Denzil Zosangliana - Neuva Section
2. Lalchhanchhuahi D/o Lalhmuaki Vanapa Section
3. Vanlalremluanga S/o TC Lalremsiama Vanapa Sect
4. Lalpeksanga S/o K. Vanlahliapi Taitesena Sect

Steel Almirah

Hunthar peng, Vaivakawn (Holy Family Church)-ah Steel Almirah tlawm takin kan zuar a, in lamah kan dahsak thei bawk.

Prop - Zohmingthangi w/o K Lalengmawia (L)
9856519679/9862559971